

**Kangaamiuni sulinermik inuussutissarsiuteqartut peqatigiiffiata
ukiunik 60-liilluni nalliussineqarnera.**

Ulloq 14. Marts 2021 sapaammi nal. 12:30 miit nal. 15:00 -p tungaanut nunaqqatigiinnut kaffellerneq ingerlavoq, piffissaq taanna inuit periarfissallit aqqusaallattaarput, meeq-qanullumi aamma pissaqartitsiffiummat taakkua mininneqanngillat soorunalumi aamma utoqqaat illuanni najugaqartut kagesugassaannik kaaffesugassaannillu pajunneqarlutik. GAS atukkallaarmat siulersuisuni ilaasortaasimasut arnat marluk suli peqqissut maanna utoqqaat illuanni najugaqarput. Ulloq taanna kaffellerfiusumi akussat kaget assigiinngitsut nerriviit qaaniitinneqarput, nerrivimmilu allami qeeqqat qullukkat saarullillu issimut panertitat immikkuulaartumi sassaalliutigineqarput kalaallillu ernga puisip orsua nerilluaatigineqarpoq. Kangaamiormiut angumerisagut oqartarput "kalaallinngooq orsoq imeraa". Kaffellerneq allaffeqarfigisatsinni ingerlanneqarpoq naammassilluarlunilu.

Tallinngorneq, 19. Marts pilersaarugtigineqartut nal. 19:00 katersortarfimmi ilaasortanut qaaqqusanullu unnussiorneq nereqatigiinnertalik nuannersumik naammassilluartumillu ingerlanneqarpoq. Unnummut tassunga atatillugu ukiumut ataasiartumik imigassallersinnaanermut akuersissut Qeqqata-Kommuneata akuersissutaa iluaqutigalugu unnussiorlut tipaatsualaartupilorujussuupput.

Unnuk aallartippoq iserluaqqusinermik, iserluaqqusisuulluni siulittaasup tullia Kitsia Petrusen tassunga tulliuullugu eqqaaniaasoqarpoq. Tulliatullu siulittaasooq oqaaseqarpoq. Kakkiussani takuneqarsinnaapput.

Unnuup aallartinnerani peqataasut ilaasortat - qaaqqusat - siulersuisut inimi isersimasut 48-lluta nerineq aallartipparput, Nerisassat sassaalliutigineqartut allani ileqqusut assiginagit, ima paasillugu: Inniminnigaanngillat, siulersuisut iggarissut igaavi nalinginnaasuupput puulukip neqai saniatigullu siulittaasup tuttutaata quttoraminersua iganut arlariinnut immikkulaaq uutaq siulittaasup igaava nerisut ilaanniik suunera paasilluarneqanngilaq.

Nerinerup ingerlanerani oqaaseqartoqartarpoq erinarsuutinillu atuiffiusarluni, nerinerullu naammassiarturnerani siulittaasuusimasut assiliaatissaannik qujassutaasumik tunnissuteqarfiuvoq. Qaaqqusat ilagaat Maniitsoq SIP-p siuttui, aappaa siulersuisuunernut ilaasortaasooq SIK sinnerlugu, Kangaamiuni SIP-mut tunissutinik pilluaqqusutinillu apuussipput tamannalu Kangaamiormiunik tigulluarneqarpoq, siulittaasorlu ujaminnatsinneqarluni.

Pisut tamakkua kingornatigut "Appigit" ingerlavoq nuannivissumik, nalorsitsaakkat iluatseriaraangassuk inimi peqataasut ilanngutiinnarlutik erinarsoqataaginnalersarlutik, nuannissusialiaasiit, taamatut pisaramik erinagissorsuit..

23:00 qitik tamanut ammasoq aallartiinnaqaaq, ilaatigut utoqqaliaarssaalersoq nammineq tusaamassaassutiminik uiguleriaatunik atuilluni nipilersortuni erinarsortaavoq.

Qitinnerup nalaani inuit 70-it sinneqatsiartut nuannisaqalutik naggataanut ikiliartulerput, unnuaq ajunngitsumik naammassineqarpoq ullaassanngoriartuleraa nal. 02:00 qaangeraa.

Imaqarniliortoq. Ulrik Lyberth



Unnuup ingerlanissaa.

1. Iserluaqqusineq Siulitt.tullia. Kitsi P.
2. Eqqaaniaaneq; maani katersuunnitsinni pissutissaqarluta ataqqillugit eqqaalagut sulisartut peqatigiiffiannik pilersitsisimasut ukiunilu qaangiuttuni ingerlatsisuusarsimasut - ilaasortaasimasut - ataqqinaammillu ilaasortagut maanna nunami maani ilagiunnaarsimasagut ataqqiniarlugit suliaannut qujalluta eqqaaniarpagut.
3. Pavani nuissat ungataanni, atussavarput.
4. Siulittaasup oqaaseqarnera.
5. Erinarsuut (Qujassutigaara suna suliaq)
6. Nerineq, oqaaseqartoqarsinnaavoq - erinarsuutini atuisitsisoqarsinnaavoq
7. Nerinerup naammassilerfiani siulittaasuusimasunut tunissuteqarfiussaaq
(Qummoroortarneq)
8. Unnuup ingerlanerani appigit ingerlajumaarpoq, unnuullu sinnera nammineq ingerlassamaarluni...

Nipilersortoqarluta qitik nal. 23:00 - 02:00 -p tungaanut ingerlatissavarput.

Siulittaasup oqaaseqarnera.

Tikilluaqquneqareeraluartusi nuannaarutigaa siulersuisoqatikka sinnerlugit maani siulittaasutut sulinermik inuussutissarsiteqartut peqatigiiffiata ukiunik 60-liineranut atatillugu unnessiornitsinni oqaaseqarsinnaagama.

Qujassuteqarumangitsuunngilanga inuiaat kalaallit ukiut taama amerlatigisut matuma siornatigut sulisartoqarnikkut ataatsimoorfissaqarumallutik sulinialersimammata, maanilu nunaqarfitsinni taamani inuttujaarsuusimasumi aamma sulisartut allani ataatsimoorfeqalersimasut malillugit peqatigiiffeqalerniarlutik suleqatigiissimmata maannamut uagut kingullarsuit taakkua aallarnersimasaat ingerlapparput tunngavissilluarsimammatigut. Massakkut ullutsinni taamaneramik sulinermi atortutigut at-taveqaatitigullu pitsaanerungaartumik sulinitsinni ikiorteqarpugut, sulilu teknikkip tungaatigut siuariartornermi pisariaqavissumik malinnaaniartussanngortitaalluta naleqqussartuartaqalersimalluta ilaatigut ulluinnarni sulinerup sungiusimasatta aallunniarneranut puullaaqisitaalluta piumaffiginnissutit angummaniarfigiriaqaratsigik katataassanngikkutta. Ikkua sulisartut ataqqinartut taamani atortorissaanngelutik inuusut ullumikkut atortugut qanoq uparuarumassagaluarnerpaat, Taamanikkut ilaasortaasut siulliit qaartiterisarsimapput qillerut illuanik tigullugu illuanik mukkertimik kaattarlugu ila piluusaartarsimassagaluqaat, taamatut naatsumik...

Maani nunaqarfitsinni peqatigiiffiup aalartinnerani siulersuisuusimapput:

Formand.	Gerth Petrussen	(1962 tunuarpoq)
Næst.Form.	Nikolaj Berthelsen	
Kasserer.	Hans Larsen	
Sekreter.	James Mathæussen	(taanna ukiorpassuarni suliaqarpoq)
Aamma.	Sara Petrussen	(siulersuisuni arnartanngorpoq)
Ilaasortat siulliit. 19-t.	Angutit 12	Arnat 7
Ilaatigut makkuupput:	Uulariugaluq	Jakobine Martinsen
	Anaralak	Bergethe Malakiassen (allallu)
	Juuteq	Karen Tønnessen
	Israel	

Fali - Suulumineeraq - Sarpillu.

Maj-p pingajuanni ataasimiinnermi tillidsmandissarsiorneqarpoq, Gerth - Nikkulaallu Nikkulaat amerlanernik taaneqarluni, aammalu arnat akiliuteqartarnissaat maj-miik aallartinneqassaarooq, taamalilluta paasivarput naligiissitaaneq ukiut qulit miss. aatsaat maanga tikissimasoq, arnartagut naligiisitaalernissinni kingusilaaraluartumik pilluaritsi. Ataatsimiinnerit atuarfimmi ingerlanneqartarsimapput.

1964. 23-ni April siulersuisut ataatsimiipput.

Ataatsimiinneq aallartippoq atuarfimmi 20:00 unnukkunngooq.. Oqaloqatigiissutigineqarluni generalforsamlingeqarnermi saqqummiussaq, sulisitsisut peqatigalugit ataatsimiissutigineqartussaq, aalajanerneqarporlu 25.april pisussanngorlugu. Aammalu GAS-mi isumaqatigiissut nutaaq sulisartunut tamanut nassuiarneqartussanngorlugu aalajangiunneqarpoq, nassuiaasussatullu qinnuigineqarpoq niuertoruseq Ole Josefsen (pakataaq).

1965-mi ilaasortani takuneqarsinnaalersimasut, makkua ilaapput.

Amos Lyberth paaluassuaq (ajorunarani aamma inuusoqataasa taasarsimavaat aqerloq) Gaapik (Gaaperalak) Ambrosius P. allasimavaa (Ambo) Kristian P. (qevorro)

1980-p aallartisimalernerani siulersuisut.

Morta - Kajesto - Lars E. - Jehu V. - Regine R. - Sikak O. aamma Sofie Kr.

Kingusinnerusukkut: lipi - Antuut - Hans A. - Karen T. Ukiullu ingerlanerini kingusinnerusukkut aamma Hans Kr. allallu maanna maani issiaqatigisagut siulersuisuni ilaasortanut ilaapput.

1980-mi Maniitsumiik pikkorissajartortoqarsimavoq aamma, ulluni pingasuni ingerlanneqasimasumi, Maniitsumi GAS-mersut ilisarnarput Eliarseralak aamma Mika Aug.

1980-ip ukiuisa ingerlanerini aamma ligoq siuttoralugu ilaanni ataatsimiitarsimapput Rækkehusikorsuup naqqata ataani liguup allafiani mattuffimmut assingunerusumi, issiavissaqartarsimannnginnamillu iikkamut taliinnarlutik nikorfarmik siulersuisuni suliatik ingerlattarsimavaat.

Ukiut ingerlammata GAS. SIK-mik taarserneqarpoq, 1999-mi SISA pilersinneqarpoq, SIK-miillu pisortanut isumaqatigiinniarnert ingerlanneqartarnerini assigiinngitsunik angusaqarfiusarsimavoq ullumikkut sulinermi atugassarititaasuni assigiinngitsutigut isumaqatigiissutit malillugit suliffeqarfanni assigiinngitsuni ukiut sisamakkaarlugit

Kattuffimmiik isumaqatigiinniunneqartarpugut, tamakkualu ulluinnarni sulinermi paarisutullusooq ingerlaqatigivaatigut, taasariaqartullu ilagaat aningaasaateqarfiit assigiinngitsut pisariaqartutigut ilaasortanut ilaqutaasunullu pisariaqalerfiini iluaqutigineqartartut. Eqqaanngitsuugassaangilarlu peqatigiiffipput Kattuffiup siulersuisuunerini ilaasortaataqarnikummat.

Taamatut eqikkaallunga peqatigiiffitta ingerlasimanera paasisutissiiffigilaarparaa.

Neriuppugullu unnuk nuannersumik ingerlatissagipput, peqqilluta ini manna qimasinnaagisigutoq....

UK